

'Dahulukan produk tempatan kukuh kembali ringgit'

Kuala Lumpur: Semua lapisan rakyat negara ini digalak mengamal sikap mendahulukan produk dan keluaran tempatan dalam kehidupan harian, bagi membantu mengukuhkan kembali nilai ringgit.

Perdana Menteri, Datuk Seri Anwar Ibrahim, ketika membuat gesaan itu, berkata semua pihak perlu memainkan peranan bersama bagi membantu mengukuhkan ringgit yang mutakhir ini menyaksikan penyusutan nilai.

"Rakyat digalakkan mengamalkan sikap 'Malaysia First' (mendahulukan produk tempatan) dalam amalan harian. Ini termasuk membeli barangan domestik serta melabur dalam pasaran modal domestik.

"Kempen melancong di dalam negara juga perlu diperkenalkan dan ditingkatkan," katanya dalam jawapan bertulis kepada soalan yang dikemukakan Mohd Syahir Che Sulaiman (PN-Bachok) di Parlimen.

Anwar yang juga Menteri Kewangan berkata, pelbagai langkah konkrit sudah dan sedang

diambil kerajaan dan Bank Negara Malaysia (BNM) bagi menangani kejatuhan nilai ringgit, termasuk memastikan pasaran pertukaran asing di dalam negeri kekal teratur.

Katanya, BNM akan mengambil langkah perlu termasuk campur tangan untuk membendung pergerakan mata wang yang berlebihan.

"Memantau penukaran hasil eksport kepada ringgit oleh syarikat pengeksport, selain meneruskan usaha menggalakkan penggunaan mata wang tempatan untuk penyelesaian eksport bagi mengurangkan kebergantungan terhadap pergerakan dolar Amerika Syarikat," katanya.

Selain itu, katanya, usaha dilaksanakan untuk mengambil tindakan bersepadu dan terselaras bagi membawa masuk aliran dana ke pasaran pertukaran mata wang asing.

"(Di samping) mengawal pelaburan luar negara oleh syarikat swasta, termasuk menggalakkan mereka mengutamakan pelaburan domestik serta menanggul-

kan pelaburan luar negara baharu.

"Pelaburan luar negara yang dilaksanakan perlu diurus secara berhemat seperti melindungi nilai pendedahan mata wang asing dan membawa balik hasil pelaburan luar negara bagi mengurangkan tekanan kepada ringgit," katanya.

Menjawab soalan Datuk Larry Soon (PBM-Julau) pula, Anwar berkata, kerajaan memahami isi rumah khususnya B40, lebih terdedah kepada penyusutan nilai ringgit disebabkan bahagian perbelanjaan lebih besar untuk makanan dan minuman, merangkumi 35.4 peratus daripada jumlah perbelanjaan bulanan.

"Keadaan ini menyebabkan golongan ini lebih sensitif kepada pergerakan kadar pertukaran disebabkan kandungan import yang lebih tinggi.

"Bagaimanapun, harga komoditi global menyederhana sedikit sebanyak membendung sebahagian kesan penurunan nilai ringgit terhadap inflasi," katanya.

Katanya, impak penyusutan ni-

lai ringgit adalah lebih tinggi terhadap barangan import, termasuk makanan yang merangkumi daging dan tenusu, ikan dan makanan laut, buah-buahan dan sayur-sayuran.

HVGT peringkat akhir

Dalam perkembangan berasiangan, Anwar berkata, kerajaan kini dalam peringkat akhir memuktamadkan beberapa dasar berkenaan Cukai Barang Bernilai Tinggi (HVGT).

Beliau berkata, pihaknya dalam proses menentukan jenis barang yang akan dikenakan, termasuk nilai ambang penentuan barang bernilai tinggi.

"Cukai Barangan Mewah yang kini dikenali sebagai Cukai Barang Bernilai Tinggi akan ditentukan mengikut jenis dan kategori barang berdasarkan nilai ambang harga barang.

"Dasar ini akan dikaji dan ditentukan dengan teliti dalam memastikan ia tidak memberi kesan tambahan kepada golongan berpendapatan rendah," katanya ketika menjawab pertanyaan Ros-

lan Hashim (PN-Kulim-Bandar Bharu) yang meminta penjelasan berhubung cukai barangan mewah ke atas barangan untuk nilai cukai bagi setiap RM10,000 serta bagaimana ia memberi kepada golongan M40 dan ke bawah.

Menjawab soalan Datuk Dr Mohd Radzi Jidin (PN-Putrajaya) mengenai bila subsidi bersasar akan dilaksana termasuk implikasi langkah itu, Anwar berkata, mekanisme pelaksanaannya masih dalam pertimbangan dan dijangka tidak meningkatkan kos kepada industri sedia ada.

Namun, Anwar menegaskan, kerajaan tetap menitik berat aspek pelaksanaan dan komunikasi yang berkesan kepada pihak industri agar tidak berlaku kejutan kepada ekonomi.

"Pelaksanaan pemberian subsidi secara bersasar ini dibuat secara berperingkat tertakluk kepada ketersediaan berasaskan kepada model yang bersesuaian dan kebolehlaksanaan serta mengekalkan fokus kerajaan dalam memastikan kos sara hidup rakyat tidak terjejas," katanya.